

## 2 Tessalonicenses

---

**1** <sup>1</sup>Natyo Paulo, Silas, Timóteo xoaha kakoa naxairatya exe babera Xekohaseti koamaniya tyaoniterenai ana wenakalati Tessalônica tyaoniterenae ana. Wexe Enore koamaniya, Xekohaseti Jesus Cristo koamaniya xoaha xisaonita. <sup>2</sup>Kasani waiye ximehexaikohare xisaona Wexe Enore hiyeta, Xekohaseti Jesus Cristo hiyeta waokita.

### **Xaxalisati Cristo Haikoahaneheta Xowaka**

<sup>3</sup>Nohinaeharenae, wihalahareta menita Enore kakoa xihiyeta, xityakekone kekoaretere, exahe xiyawaiyetyakakoane tehitiya hoka kekoaretere hiyeta. <sup>4</sup>Hiyeta hoka waokowiharetyoita xikakoa Enore tyakekoterenae hotyalinae koni. Waokowiharetyoita xikakoa, ximamaxaharenehareta xisaonitere, exahe xityakekone hiyeta. Matyakekoneharenae iniyalahare xakore mokahitaha xiso, exahe kirakoane xakore xikaxomokakita hoka.

<sup>5</sup>Nikare xikaxomokakita hoka ehekore Enore iniyalahare moka aokowita iniyalahare nomaseharenai. Iniyalahare xikaxomokakita xawenane ekoamaniya hiyeta hoka ewaikoherakoa xetarenae terota atyo xiso. <sup>6</sup>Enore ite waiyexe taita tyoma hoka iniyalahare mokiterenae xiso ite iniyalahare moka. <sup>7</sup>Xekohaseti Jesus haikoahetehenere enokoata anjonai kinaterexenae kakoa xowaka. Hatyo xowaka tehitiyaite xikawinihena, exahe wiso iniyalahare wikaxomokakiterenae tehitiya hoka.

<sup>8</sup>Irikati kakoa ite haikoaheta hoka iniyalahare mohena Enore koamaniya mawenaneharenae, matyakekoneharenae, masemaxemalaharenae Iraiti Waiyexe Wiyekohase Jesus tahi. <sup>9</sup>Kalore ite iniyalahare kaxomokakaha matyotenehare, kamawenekoaretyakaha maheta. Exahe haware ite Xekohaseti nonitata, exahe iniyatere waiyexe nonitata hoka kaxomokakaha. <sup>10</sup>Hatyo xowaka ite nikare tyaona tyohetehenere xowaka. Hoka ekoamaniya tyaoniterenae ite ihalahareha ekakoa, exahe aiminisahenite tyotyta tyakekohenerenenai. Hatyo xowaka ite xiso tehitiya enekoniha xisaonita iraiti wiyakaihenerere xihiyehoka xityakekohenerere hiyeta.

<sup>11</sup>Hatyo hiyeta heko wiraexaita xomana. Wenorexa atyo aoka xiso haomana waitare wenati maniya xisaona maheta hoka waxita hoka kahinaetya xiso aokitere akereta xisaona maheta. Hatyo hiyeta waxita tehitiya kasani

kahinaetya xiso hoka tyotyxa xoolini hare waiyexe xisoma xaokowitere xisoma xamematya xityakekone kakoa waokita. <sup>12</sup>Nikare ite hoka Wiyekohase Jesus kaxaiminisaka xihiyeta. Xiso tehitiya ite hoka xikaxaiminisaka ihiyeta, Wiyekohase Jesus Cristo nawaiyexehare, wEnorexa nawaiyexehare hiyeta.

### Haliti Matyakekonehare

**2** <sup>1</sup>Nohinaeharenae, Wiyekohase Jesus Cristo tyoaneneheta, exahe wiyahohisakakoatyoane ekakoa akiti wirae xikakoa: <sup>2</sup>Awa atyo xiyahékola xexawareharetya haxerore, exahe hoka awa atyo ximawaiyehare haiyaharenae: “Koxaka Xekohaseti haikoaheta”, nehena hoka. Xoana iraiti semasehare xamani, xoana Iraiti Waiyexe xakaisasehare xamani irahena, xoana wiyairala xamani aohena hoka awa atyo xityakeko. <sup>3</sup>Awa atyo nikare maoserahena xiso hoka xityakekohena. Hiyaiya, Xekohaseti kaokeneheta nahititaite halitinae kahalakoohare Enore kakoa hoka Iniyalahare Nomasehare aokahitere kaotyaka. Hatyo haliti atyo irikati mawakenehare koni xetare terota. <sup>4</sup>Tyotyxa Enore kaxaokakiterehare nahalakoohare ite tyaona, exahe xoolini hare Enore anere kaxaokakiterehare nahalakoohare ite tyaona. Tyotyxa xoolini hare xahehare ite tyaona aokowi hoka xane isoa Enore hanako hoka Enore aokowihena. <sup>5</sup>Xoana maisa xotyare? Tyotyxa hatyoharenae noxakai xihiyé notyaonitatere xihaliya xowaka.

<sup>6</sup>Xakore hoka xoolini hare talaitene hoka maisa kalini aliyakere kaotyakere hoka hatyohare waiyehahalakita xomana. Hoka ekaotyakene xowakaite hatyo Iniyalahare Nomasehare kaotyakehena. <sup>7</sup>Hoka Metaharexe Iniyalahare aokahitere koxaka kaotyakehena. Xakore hoka kaotyaka aokowitere ite kaotyaka, kakikisaka hotohare ite haware hatyo talaiterene hoka.

<sup>8</sup>Hatyaoseta ite Iniyalahare Nomasehare kaotyakehena hoka Xekohaseti Jesus haiyateré kakoa haikoahetehenere xowaka ite haxaohomane kakoa ite aisene, exahe mawenekoaretene ite haxaokanala kakoa. <sup>9</sup>Iniyalahare Nomasehare ite kaotyaka Ahalakoohaliti niyateré kakoa hoka tyotyxa xoolini hare mawaiyakahare tyomehena katyakekotyaka maheta. Maoseratya ite halitinae tyaonaha ekoamaniya maheta. <sup>10</sup>Tyotyxa xoolini hare iniyalahare kakoa ite maoserahena halitinae irikati mawakenehare xetarenai. Hoka wainiha ite, maisa atyo tyakekoahitaha, exahe awaiyetyahitaha Iraiti Waiyexe iniyalahare nonitata niyasehareheta hoka. <sup>11</sup>Hatyo hiyeta Enore halakisahene, maoserare aeroretyoa ihiyeha hoka maoserare tyakekoha maheta. <sup>12</sup>Hatyo harenae hiyeta ite tyotyxa Iraiti Waiyexe matyakekoneharenae, exahe maoseratyati xema taita tyaonitereharenae mawenekoaretyaka aoka Enore.

### Maika Xikinateré Xisaona

<sup>13</sup>Nohinaeharenae, wihalahareta menita Enore kakoa xihiyeta, Xekohaseti awaiyetita xiso hoka. Hiyaiya, xiso hotohare Enore aoka haomana Isekohaliti Waiyexe niyateré hiyeta, exahe hoka Iraiti Waiyexe xityakekone hiyeta. Nikare

tyoma ekaxaikone hotyalihare xisaona maheta. <sup>14</sup>Enore aoka xiso haomana nikare xisaona maheta, wiyakaihenere Iraitu Waiyexe xihiyeta hoka xiyane xikaoka Wiyekohase Jesus Cristo waikohera waiyexe nali maheta. <sup>15</sup>Hiyeta hoka nohinaeharenae, maika xikinaterere xisaona Xekohaseti koamaniya, exahe heko iraitu wiyakaihenere waxairahenere xomana xotyaxematya.

<sup>16</sup>Wiyekohase Jesus Cristo awaiyitita wiso, Wexe Enore hoka awaiyetita wiso. Hoka hawaiyexehare hiyeta mamairanehaliti matyotenehare isa womana, exahe hoka heko wikinaterere watyaha exahita maheta. <sup>17</sup>Kasani Xekohaseti Jesus, Wexe Enore aihalanalinikisa xiso waowita, exahe kahinaetya xiso hoka waiyexe taita xirae, xisoma taita.

### Maika Xiraexatya Womana

**3** <sup>1</sup>Imiyanehena nohinaeharenae, maika xiraexaita womana, hoka haxeroreta Iraitu Waiyexe xaorekoa hoka aokahene haomana xiso xaohenerene xomana akereta. <sup>2</sup>Maika xiraexatya tehitiya hoka Enore kaxaiko wiso mawaiyexeharexena, xalijiniharexena nonitata. Hiyaiya, maisa tyotyta halitinae tyakekore Iraitu.

<sup>3</sup>Xakore hoka Xekohaseti atyoite maisa maotyana wiso. Aiyatelikisa ite xiso, exahe Tihanare nonitata ite kaxaiko xiso. <sup>4</sup>Enore hiyeta wityakekota xiso. Kala waokitere akereta xisaonita, exahe hoka nikare ite heko xisoma. <sup>5</sup>Maika Xekohaseti kahinaetya xiso hoka xawaiyetya Enore, exahe hoka ximamaxaharenehareta xatyaha wenati waiyexe Cristo kakoa xahita.

### Tyakekohatiye Metalaharenae

*(1 Tim. 4.1-3; 2 Tim. 3.1-9; 3 João 9-11)*

<sup>6</sup>Nohinaeharenae, Xekohaseti nexare kakoa waxikatya: haiyaharenai wihinaeharenae maxahalitikarenae akereta, exahe maisa semaxematya aokowiyeha wiyaotyakira wahalakihenere xomana. Maika xakikisoaheta enonitaha. <sup>7</sup>Xawaiyoreta xawenane kakoa. Maika wawenane akereta xisaona. Hiyaiya, maisa maxahalitikare akereta xini wisaonitere xinekoni xowaka. <sup>8</sup>Maisa xoare maxaimanahareta wikaohakarere. Wahakita wihatene hiye winakaira nyahare, maisa wimaxahareta. Haiya xowaka wikirahareta wihatene hiyeta. Wahakita wihatene makiya, ferakoa xoaha, waiye aliya hoka xiso wihinaeharenae nakaira wamiyatya waokita hoka. <sup>9</sup>Aliterexe atyo wawaiye kahinaetyaka. Xakore atyo hoka maisa atyo xoare waxare, kasani wisaonitere akereta xisaona waokita hoka. <sup>10</sup>Nali wisaonitaterere xihaliya xowaka exakere waotyakisa xiso: “Xala xamani atyo maisa haka aokowiye hoka maisaiya atyo kanakairita”.

<sup>11</sup>Wasema haiyaharenae maxahalitikare akereta tyaonitere xinekoni hoka hatyo hiyeta nikareta wiso. Maisa xakore xoare tyomare hoka xane hahinaeharenae nawenane watyalitata. <sup>12</sup>Xekohaseti Jesus Cristo xaokalita wirae, heko waiyateretyoa hatyo halitinae kakoa, kasani waiye tyaonaha,

exahe hakaha hoka kanakairaha hahateneha hiyeta waokita. <sup>13</sup>Xakore hoka, nohinaeharenai, awa atyo waiyexe xománe kakoa ximaxaharehena.

<sup>14</sup>Exahe xala xamani maisa tyakeko aokowita exe iraiti waxikaitere xomana hoka hatyo hiyeta waiye xiyaiyahena. Waiye xiyaiyene hoka xakikisoa enonita haihare maheta. <sup>15</sup>Xakore hoka awa atyo xahalakoahare akereta xamokene. Maika xaotyakisene xihinaehare akereta.

#### Iraitinae Miyane

<sup>16</sup>Maika Xekohaseti mehexasikohaliti kakoa tyaonitere mehexasikohaliti isa xomana tyotyaki ferakene, exahe aliyakere xamani xisaonita hoka. Kasani Xekohaseti tyaona xityoty xikakoa naokita.

<sup>17</sup>Nokahe kakoa naxairatya exe: Paulo jinakala. Exakere naxairatita tyoty noxairalinae baberanekoa, exakere naxairaita. <sup>18</sup>Maika Wiyekohase Jesus Cristo kaxaiko xiso, eko xoaha.